

Bavuselele isikhwama esiboleka osomabhizinisi

BONISWA MOHALE

SETHULWE kabusha isikhwama esisiza osomabhizinisi ngemali i-KZN Growth Fund esasungulwa eminyakeni eyishumi edule.

Ngokusho kwesikhulu esiphazulu se-KZN Growth Fund uMinuz Siddiq Adam bazongena emkhankasweni wokukhangisa isikhwama sabo ngoba bathole ukuthi yize sesibe khona yonke le minyaka kodwa asaziwa.

"i-KZN Growth Fund yasungulwa ngo-2004 kanti isisize izinkampani ezimbili okuyi-Southern African Shipyards ethole ithenda ka-R1.4 billion ngesonto edule ne-Dark Fibre Afrika Initiative efaka amakhebuli ezokuxhumana ngaphansi komhlaba nasolwandle. Kwadaleka amathuba angu-4 201 omsebenzi kwathuthuka nomnotho wakwaZulu-Natal emikhakheni ebishoda ngabanyama. Sifuna abantu bezoboleka imali kithina njengoba sisele no-R500 million kulo nyaka wezimali," kusho u-Adam.

i-KZN Growth Fund yasungulwa nguMnyango wezokuThuthukiswa koMnotho kwaZulu-Natal ngosizo lwe-Development Bank of Southern Afrika ne-Standard Bank, inabasebenzi abangu-20 abayizazi emkhakheni ehlukahlukene kwezomnotho.

Okwenza ukuthi i-KZN Growth Fund ingaziwa wukuthi ibinenzalo ephazulu ngakho abantu bebengakukhuthaleli ukuboleka imali kuyo.

Ibiphelelwe ngendlela engajwayelekile, ingenayo imikhayizelo eminingi futhi imali eningi ichtithwa ekukhokheni izindleko zokusebenza kwayo.

U-Adam uthi sebenendlela ehlelekile yokuphatha, kunebhodi elisha eliqokwe nguNgqongqoshe wezokuThuthukiswa koMnotho, ezokuVakasha neMvelo uMinuz Michael Mabuyakulu.

Abantu bayavashesha ukuyithola imali futhi izindleko zokusebenza kwe-KZN Growth Fund zisuke ku-R46 million zaya ku-R28 million okusho ukuthi sekukhokhelwa ugesi, amanzi irenti namaholo abasebenzi.

Inzalo yakhona isiphansi akusafani nangesikhathi abantu bebezizwa sengathi baboleka komashonisa ngenxa yokumba eqolo kwayo.

Kunezinhlelo ezizohlomulisa abantu baleli sifundazwe ngamakhono namathuba omsebenzi.

"Sixhasa izinhlelo ezikwaZulu-Natal ngoba siyisikhwama sikhulumeni. Kumele kube yibhizinisi labantu abamnyama noma elinohlelo lwe-Broad Based Black Economic Empowerment oluzothuthukisa umnotho wesifundazwe, luhlomise abantu ngamakhono lwakhe nenqwaba yamathuba omsebenzi. Zonke lezi zigaba ziyizibheka ngaphambi kokudlela imali ngoba inhlalo yethu wukuqeda ububha negebe eliphakathi kwabacebile nabampofu," kusho u-Adam.

Uthe abafani nezinye izikhungo ezejwayelekile ngoba yize bebolekisa



MICHAEL MABUYAKULU



SIDDIQ ADAM

ngemali inhlalo yabo enkulu wukuthuthukisa umnotho hhayi ukwenza inzuzo.

"Uma ungenazo isibambiso siyakwazi ukuthi uma uthenga embonini ungakhokhi isikweletu iminyaka emibili ngesikhathi usaqala ukusebenza. Lokhu sikwenziswa wukuthi siyazi ukuthi osomabhizinisi esibaboleka imali bazosebenza futhi inzuzo ayisheshi ibonakale uma usaqala ibhizinisi. Sibolekisa ngemali esukela ku-R30 million igcine ku-R200 million. Isikhwama sinempilo yeminyaka engu-15 (closed lifespan) kodwa okuzosenza siqhubeke nokusebenza wukuthi ngonyaka ozayo uhulumeni uzokwethula i-Equity Fund esiza abangenayo imali yokubambisa ngokubakhokhela u-30% wemali esuke idingwa kubona bese thina sibaboleka u-70%," kusho u-Adam.

UMabuyakulu uyincomile i-KZN Growth Fund wagququzela nosomabhizinisi ukuba bayisebenzise ngoba izoqeda igebe eliphakathi kwabampofu nomacaphunakusale.

Uthe i-KZN Growth Fund ibalulekile ngoba igququzela osomabhizinisi ukuba batshale imali kwaZulu-Natal.

Imikhakha exhaswa yi-KZN Growth Fund ngowezokuthutha nokuthunyelwa kwempahla, ukukhizwa kwempahla, ezokuxhumana, ezamandla ngesi, ezokuthuthukisa kwengqalazinda yezempilo nokufunda, ezolimo nokuthuthukiswa kwemikhayizelo yakhona, ezezimayini nokusiza imiphakathi eyakhele izimayini ukuba ihlomule neminye imikhakha

Liqhubekela phambili ibhizinisi elasungulwa ngoR25 000

BONISWA MOHALE

WENZA izigidi owaqala ibhizinisi lokwakha amafriji emicimbi ngo-R25 000 ngoba engakwazi ukuboleka imali ethe xaxa ebhange.

UMnuz Ntokozo Biyela (38), wenkampani iMzansi Mobile Units ayisungule ngo-2007, uthi okwamenza wasungula ibhizinisi lokwakha amafriji angomahamba nendlwana wukubona usizi abantu ababebhekana nalo uma kunemicimbi emikhulu.

"Ngangibuka ukuthi abantu abanayo indawo yokubeka inyama esuke ihlatshiwe noma ithengwe yaningi kwenzelwa umcimbi.

"Abanye babeyibeka endlini yokhethe abanye bagcwalise u-ayisi ebhavini likathayela. Ngqhamuke nesu lokwakha amafriji angomahamba nendlwana abeka inyama, ziphuzo nokudla," kusho uBiyela.

Uthe ngesikhathi esungula ibhizinisi babengokho abantu abanza amafriji angomahamba nendlwana kanti iningi labakhona njengamanje liqeqeshwe nguye.

Kwakungelula neze ngesikhathi eqala kwazise wayeno-R25 000 kuphela engenaso isibambiso esidingwa yibhange uma izoboleka usomabhizinisi imali.

Ungomunye wosomabhizinisi baseThekwini abakwazi ukuthola amakhasimende ngokuhambela umbukiso iDurban Business Fair

"Ngiqale ukusebenza ekhaya emuva kokuza kwiDurban Business Fair senginefemu eWestmead eduze kwasePinetown. Ngimakhasimende eMauritius, Lesotho, Angola nakwamanye amazwe ase-Afrika futhi ngenza izigidi. Ngiqale ngisebenza nomuntu oyedwa manje senginabasebenzi abangu-



UMNUZ Ntokozo Biyela, weMzansi Mobile Units, uthi osomabhizinisi kumele basebenzise imibukiso yamabhizinisi ukuzikhangisa nokuthola amakhasimende amasha

Isithombe: PATRICK MTOLO

20," kusho uBiyela.

Ukuhambela imibukiso emikhulu njengeDurban Business Fair uthi kwamsiza ukuthola amakhasimende nokuthola uxhaso lwemali luka-R500 000 ngoba abakwaStandard Bank babebona ukuthi ibhizinisi lakhe lizophumelela.

U-R500 000 awuthola kwaStandard Bank wamsiza ukuthi akhe amafriji angu-15 njengoba ayeseethola nama-oda amakhulu kanti emuva kwalokho ulokhu ekhule njalo.



SIXHUMANISA UMBUKISO WAMABHIZINISI NAMAZWE

19-21 SEPTEMBER 2014
DURBAN EXHIBITION CENTRE
KUNGENWA MAHALA

Okusho okuzokwenzeka

- 19 SEPTEMBER 2014
- 20 SEPTEMBER 2014
- 21 SEPTEMBER 2014

Ukhelo lombukiso wamabhizinisi

- 19 SEPTEMBER 2014
- 20 SEPTEMBER 2014
- 21 SEPTEMBER 2014

Mvelo noyise ukwazi khumona
rekhora Communications 031 266 5997/5 noma i-email abantu@rekhora.co.za

Website: www.durbanbusinessfair.co.za